


Gregorian: Potpuna podrška operaciji koja se provodi protiv Mladića



Vršilac dužnosti visokog predstavnika Raffi Gregorian izrazio je svoju punu podršku današnjoj zajedničkoj akciji EUFOR-a, NATO-a i policije Republike Srpske protiv mreže pomagača optuženika Haškog tribunala Ratka Mladića koji još uvijek nije izveden pred lice pravde.

«Sve naše napore smo preusmjerili na mrežu pomagača Ratka Mladića u BiH, nakon što je u ljeto prošle godine uhapšen Karadžić. Današnja akcija je dio regionalnih napora da se bjegunac Mladić izvede pred lice pravde i da se na taj način ukloni opterećenje koje, zbog njegovog odbijanja da se preda, gasi nade milionima ljudi», rekao je Gregorian.

«Obaveza ostvarivanja pune saradnje s Haškim tribunalom je na prvoj stranici Dejtonskog mirovnog sporazuma», rekao je Gregorian. «OHR će i dalje podržavati aktivnosti koje poduzimaju međunarodni organi i lokalni organi vlasti na ispunjavanju ove zakonske i moralne obaveze» rekao je Gregorian.

Iako se sudi njegovim višim oficirima, Ratko Mladić još uvijek nije izveden pred lice pravde uprkos činjenici da ga Srbija poziva da se preda. «Mislim da za jednog oficira nema sramnijeg poteza od napuštanja svojih podređenih da bi spasio sebe», rekao je Gregorian. Međunarodne i lokalne sigurnosne

institucije i agencije za provođenje zakona su odlučne u namjeri da ispune svoj mandat. «Mladić je odlučio da se ne preda dobrovoljno, što znači da mora biti uhapšen i prebačen u Hag».